

հեռանում թիկունք: Թիւրք ներկայացուցչի ասելով՝ թիւրքերն արդէն բոլջեւիկների հետ կնքել են հաշտութիւն, որով մենք պէտք է քաշւենք մինչև Սարըղամիշ՝ յանձնելով թիւրքերին ամբողջ պաշարն ու գէնքը»:

*

Երզնկայի անկումը, լախտի հարւածի պէս, ցնցեց ամենքին: Վերահաս վտանգը բացայայտ էր: Այնքա՞ն ճիգով և արիւն-քրտինքով բնակեցւած թիւրքահաստատանը նորից դատարկոււմ էր: Երզնկայից մինչև Վան տեղա-հան եղած ժողովուրդը՝ դադթում էր. փախտականների շարանը սկսել էր հասնել Երևան ու Թիֆլիս: Նորից՝ աւեր ու թշւառութիւն ամէն կողմ: Թիւրքահաստատանը մահացու վտանգի առջև: Աւելին. թշնամին մօտենում էր Ռուսահաստանի դռներին: Եւ ամենքի աչքերը յառած էին Էրզրումին: Էրզրումը դարձել էր հայութեան յոյսի փարոսը: Ազգային Խորհրդի և Ապահովութեան Խորհրդի ջանքերը ամբողջապէս ուղղւած էին այդ կողմը:

Բայց իրապէս ի՞նչ էր ներկայացնում այդ ժամանակ Էրզրումը: Այն-տեղ համախմբւած էին հայկական կորպուսի առաջին բրիգադի հետևեալ զորամասերը. — Էրզրումի գունդ՝ 2 գումարտակ, 600 սեին, Երզնկայի գունդ՝ 3 գումարտակ, 1400 սեին, 2 լեռնային մարտկոց 8 թնդանօթով, առաջին հրացանածիգ գունդը՝ 2 գումարտակ, 500 սեին, 4րդ հրացանածիգ գնդի մէկ գումարտակը 300 սեինով, Էրզրումի գումարտակը 300 սեին, 3 խումբ կամաւորներ՝ 400 ձիաւոր: Ընդամենը, ուրեմն, 9 գումարտակ, 3 խումբ՝ 3100 սեինով ու 400 ձիաւորով և 2 մարտկոցով՝ 8 թնդանօթով:

Բացի այս ուժերից, Էրզրումի ամրութիւնները ունէին բաւական ուժեղ հրետանի 400 բերդային և դաշտային թնդանօթներով, որոնց մեծա-դոյն մասը, սակայն, անգործածելի վիճակի մէջ էր՝ լքւած ու թողւած խորունկ ձիւնի մէջ. հազիւ մի-երկու տասնեակ թնդանօթներ պահել էին իրենց ռազմունակութիւնը: Էրզրումի հրետանին վարում էին 40 ռուս սպա-ներ և 400 զինւորներ, որոնց մարտական ոգին ու բարոյականը այնքան էլ բարձր չէին: Ռուսական սպայակոյտը փետր. 12-ին Էրզրումից տեղափոխ-ւել էր Սարըղամիշ և բերդի պաշտպանութիւնն ու զօրքերի հրամանատա-րութիւնը անցել էր հայերի ձեռքը:

Էրզրումի ամրացւած չրջանի պետ նշանակւել էր Անդրանիկը: Քաջ հայդուկ, հիանալի խմբապետ, պարտիզանական կռիւների հմուտ վարիչ՝ Անդրանիկը, զօրավարի ուսադիրներ զնելուց յետոյ, մեծ չափով կորցրեց իր հմայքը: Ուսադիրները չէին արգելում, որ ռուսական բանակի սպաները շարունակէին համարել նրան խմբապետ՝ անձեռնհաս վարելու խոշոր զօրա-մասեր և բերդի պաշտպանութեան բարդ դործը: Անդրանիկը ինքն ևս, իր հերթին, լաւ չէր գգում իրեն նոր դերում. ո՛չ խմբապետ էր, ոչ զինւորական: Խմբապետութիւնից հրաժարւել, զօրավար չէր դարձել: Այդ պատճառով, մինչև վերջ էլ չկարողացաւ կենտրոնացնել իր ձեռքը բերդի և զօրամասերի ղեկավարութեան դործը: Այս պարագան քիչ չնպաստեց Էրզրումի արագ խորտակումին: